

Qalam

Majalah bulanan Melayu terbit tiap-tiap awal bulan Masihi.

Bilangan 13 – Zulkaedah 1370 – Ogos 1951 – 60 sen

MENUNTUT PERUBAHAN!

Masyarakat kita di Semenanjung Tanah Melayu ini telah lama menuntut perubahan tetapi malangnya ada di antara kita orang-orang yang sebenarnya bersifat “musleh” dan pembentuk perubahan! Atau ada orangnya tetapi tidak berani mara ke tengah, hanya mereka berpada dengan duduk berkhalwat membatukan diri. Banyak perkara yang masyarakat kita menuntut perubahan di dalamnya tetapi buat sementara ini kita dengan gemarnya suka menarik perhatian umat Islam di sini berkenaan satu soal yang sangat penting kedudukannya di dalam masyarakat dan tak patut rasanya diabaikan. Soal ini ialah soal khutbah Jumaat!

Khutbah Jumaat sangat besar ertiinya di dalam sesuatu masyarakat Islam tetapi sayang kesempatan yang besar ini telah disesiakan oleh khatib-khatib kita yang dihormati dengan khutbah-khutbah yang tidak sesuai dan tidak mempunyai roh yang boleh meniupkan semangat kesedaran kepada pendengar-pendengarnya.

Pentingnya khutbah Jumaat ini akan dapat diketahui dengan jelasnya kalau kita berbalik kepada sejarah Islam dalam zamannya yang gilang-gemilang iaitu dibaca oleh Khalifah al-Muslimin sendiri di Masjid Jamek ibu negerinya dan dibaca oleh naib-naibnya dalam tiap-tiap masjid yang terletak dalam wilayah masing-masing.

Isi khutbah itu sudah tentu tiap-tiap minggu bertukar-tukar menurut keadaan yang munasabah iaitu mengupas sesuatu perkara yang terjadi dalam minggu itu. Alangkah elok kalau jejak kaum kita yang terdahulu dijadikan panduan?

Umat Melayu tegasnya umat Islam di Semenanjung

Tanah Melayu ini sedang terduga pada hari ini. Agamanya mulai menerima ujian – kalau tidak ancaman, bangsanya hendak dileburkan dan dikikis dari alam al-wujud, negerinya hendak difaraidkan dan dijadikan mangsa tumbang dan tiap-tiap seorang asing (asing agamanya, asing bangsanya, dan asing kebudayaannya nampaknya hendak diberikan pisau untuk melapahnya!

Bahaya keadaan yang menyedihkan ini – bahkan yang menitiskan air mata – inilah yang wajib dikhutbahkan dengan serentak pada tiap-tiap masjid di segenap pelosok tanah Semenanjung bukannya dalam seJumaat sahaja malah selama beberapa Jumaat atau beberapa bulan hatta beberapa tahun sekalipun selagi soal ini masih heboh dan menggemparkan masyarakat!

Soal ini wajib dikupas oleh khatib-khatib kita dengan jelasnya. Terangkanlah kepada hadirin bagaimana bahayanya mencuaikan hak sendiri dirampas oleh orang-orang asing, dan bagaimana bahagian yang akan didapati kalau kita bersungguh-sungguh mempertahankannya. Memandang bahawa “Islam” dan “siasah” itu tidak boleh berpisah dan tidak ada satu tenaga yang boleh memisahkannya maka soal ini dengan sendirinya telah menjadi kewajipan ketua-ketua agama memberi penerangan dengan seberapa banyaknya sehingga semangat kesedaran kaum kita hidup dalam erti kata yang sebenar-benarnya dan dengan itu keselamatan kaum kita akan terjamin.

Gerakan yang hendak mendesak orang-orang Melayu supaya beralih membiarkan hak mereka diperkotak-katikkan oleh orang-orang asing yang menumpang di negerinya hendaklah ditindas sebelum berakar tunjang hatta walaupun gerakan tersebut dipimpin oleh dua tiga kerat kaum kita sendiri. Khutbah-khutbah yang demikian inilah yang mesti dipantaskan ke telinga oleh khatib-khatib kita pada tiap-tiap Jumaat kerana berbakti kepada Allah bukan tertentu kepada rukuk dan sujud sahaja tetapi mempertahankan keselamatan agama, bangsa, dan tanah air adalah suatu kebaktian yang tidak tertolok banding dan kerana itulah agama Allah telah diturunkan.

BUNGA RAJAH PERFUME

**YANG MENAWAN HATI
AIR WANGI BUNGA RAJA**

ROBINSON & CO., LTD.
(Tertubuh di Singapura) Raffles Place, Singapore.

Harga \$3.00 Sebotol
Boleh didapati daripada:

Orang yang menganjurkan gerakan yang berbahaya itu bukan sahaja telah berdosa kepada agama, bangsa, dan tanah airnya tetapi telah berdosa besar kepada Allah kerana menjudikan nasib bangsanya dan kerana inilah telah tiba wajibnya segala unjurannya itu hendaklah dijauhi dan dilontarkan ke pauh Janggi!

Bacakanlah ayat-ayat Quran yang sesuai maksudnya mengupas penyakit masyarakat kita pada hari ini dan yang menjadi ubat penawar yang mustajab sekali, seperti:

Yang maksudnya:

“Wahai orang-orang yang beriman! Janganlah kamu jadikan sahabat-sahabat rapat lain daripada golongan kamu (kerana) mereka itu tidak putus (berikhtiar) menarik bala bencana atas kamu, mereka suka akan apa yang menyusahkan kamu, sesungguhnya kebencian telah terbit dari mulut mereka, tetapi apa yang disembunyikan oleh hati mereka adalah lebih besar lagi, sesungguhnya kami telah terangkan tanda-tanda jika kamu mengerti.” – 117, Al-Imran.

Firman-Nya lagi yang maksudnya:

“Tidak engkau akan bertemu suatu kaum yang beriman kepada Allah dan hari akhirat itu mencintai orang yang memusuhi Allah dan rasul-Nya, walaupun (yang memusuhi itu) bapa-bapa mereka atau anak-anak mereka atau saudara-saudara mereka ataupun keluarga mereka.” 22. Al-Mujadalah

Sekianlah, mudah-mudahan apa yang kita bayangkan ini menarik perhatian.

“Wahai orang-orang yang beriman! Mahukah kutunjukkan kepada kamu satu perniagaan yang akan melepaskan kamu daripada seksa yang amat pedih?

“Ialah bahawa beriman kamu kepada Allah dan rasul-Nya dan pertahankanlah agamanya dengan harta dan diri kamu. Itulah yang terlebih baik bagi kamu jika kamu mengerti!”
-Quran Karim.

-----*-----*